


Ina pintga giraffa fascinescha varga melli affons e carschi

Ina historia da success: Igl autur, illustratur ed editur Guido Tomaschett e sia Bimba

■ (abc) La branscha da cudischs, la litteratura in summa, ed en special quella en lungatg romontsch, sto sedustar fetg da contonscher la glieud. In cudisch, cumpariu per quest atun, dat actualmein da discuorer. Guido Tomaschett, igl illustratur da Zignau a Domat, ha ils davos meins vendiu varga melli exemplars da siu cudisch illustrau «La pintga giraffa Bimba». Mintgamai igl atun cumparan silla fiera da cudischs numerusas ovras novas. Producents ed editurs sesprovan da contonscher la glieud per Nadal. Biars tals products sfundran denton ell'inflaziun commerciala dil temps avon Nadal. Adina puspei gartegia ei ad in ni l'auter da quels products da seprofilar. In da quels para in cudisch d'affons dil pictur artist Guido Tomaschett (41), da Zignau a Domat, dad esser. «Bimba, la pintga giraffa» ei scretta, illustrada e schizun edida en atgna reschia. Igl autur ha entochen ussa negin motiv da selamentar. L'emprema ediziun da 1000 exemplars ei exausta. In dils motivs daco che quell'ovra anfla talmein bun'accoglientscha ella dira fiera da cudischs ei ch'ella ei scretta biling, en sursilvan e tudestg.

Finanziau sez l'ovra

Las illustraziuns realisticas plidentan ed animeschan immediat. Ils maletgs dils animals africans en colurs galias ha in illustrader indigen scaffiu, buca in picter dalla Tiaratudestga ni dalla Bassa. Quei po esser in ulteriur motiv daco che Bimba fascinescha e plidentan. In auter motiv pudess la promoziun dil product esser. Ils consorts Guido e Silvia Tomaschett-Giger han finanziau complettamein sez l'ovra. Els ein perquei interessai che l'investiziun anfla bun'accoglientscha. Dapi l'entschatta settember han igl artist e l'organisatura visitau 23 bibliotecas, librerias e locals publics. Naven da Sedrun tochen a Landquart



Duront la prelecziun a Laax: Ils affons teidlan cun bucca e nas las aventuras dalla pintga giraffa Bimba. FOTO A. BEELI

ein ils consorts semess sin turnea cul cudisch dalla pintga giraffa. Quei engaschi ha Guido Tomaschett prestau en siu temps liber. Igl illustrader ed autur lavura a Cuera sco menader d'ina gronda stizun.

La davosa prelecziun a Laax

Gia varga 1000 personas han viu il cudisch dall'Africa el decuors dallas prelecziuns. Gliendisdis vargau han Guido e Silvia Tomaschett presentau el ella biblioteca a Laax. Igl ei stau la davosa staziun dalla turnea. «Ella ha ina lunghezia culiez e combunas», aschia descriva Guido Tomaschett la pintga giraffa. Rondund dus tozzels affons teidlan cun bucca e nas. «Saveis vus tgei che l'Africa ei?», damonda il raquintader. Ils affons tegnan si det, els paran gia d'esser culla fantasia ella tiara dils liuns, giraffas, zebbras, schemias, crocodils, elephants e

hienas. Ella biblioteca eis ei quiet, ins auda tuns d'utschals e musica relaxonta. Guido Tomaschett raquenta co la giraffa Bimba nescha e co ella entscheiva a perscrutar siu mund. Prest anfla ella in amitg, in grond e sabi.

Il grond elephant Macumba vul musar alla pintga giraffa l'entira Africa. Sin lur viadi empran Bimba bia caussas da Macumba. Per exempel co sedefender da liuns, co anflar umbriva sut in baobab ni co igl elephant spendra Bimba d'in crocodil. Ch'els elephants han in grond mo fetg fin nas vegn Bimba el decuors da siu viadi tras l'Africa era ad experimenter. Secapescha ch'els hipopotams, ils «tgulis» dall'aua, astgan buca muncar. Il raquintader tschaffa ils affons, ins senta tier beinenqual il battacor, els selaian inspirar, ins vesa co la fantasia ei lunsch naven, al puoz d'aua, el cagliom ni sut ina plonta gigante.

Mai staus ell'Africa

Cudischs d'affons romontschs – era ils pli buns – anflan buc adina la meritada accoglientscha. Co declara Guido Tomaschett sez il success evident da siu cudisch dalla giraffa Bimba? «Ch'el ei screts biling en romontsch e tudestg ei segir in avantatg», manegia igl autur. En que connex hagi el retschiert biars resuns positivs. Ovras genuinas dad indigens secontractan savens da nosa cuntrada e da nosa glieud. Ch'in indigen ha scret ed illustrau in cudisch dall'Africa ha franc era contribuui al success. Igl autur da Bimba ei buca in jester, mobein in dretg Grischun, in dils nos. E tgi va buca bugen sin viadi, silmeins ella fantasia, seigi affon ni carschiu? In interessant aspect ei che Guido Tomaschett ei mai staus ella Africa. El ha sez pia era aunc mai viu Bimba, Macumba e tut ils auters animals fascinonts ora ella natira selvadia.